




Kaduwa

Leveled



Wolayttatto Doona



Ha gujo nabbabo maxaafay Yuu Essi Eyidiyappe (USAID) beettida miishshaa maaduwan Seev Ze Chiddirenee (Save the Children), Luxettaa Moconayne Tohossa Dalgga Manttiya Luxettaa Beeroy issippe hashetin giigidi attamettidaagaa.

2009 M.L.



USAID
FROM THE AMERICAN PEOPLE



Save the Children



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>




Kaduwa

Kifilee 3

Saaminttay 19

Leveled




Luxissiyageetussi Kaaletuwa

Naati nabbabuwa doommanaappe kase misiliyanne huuphe yohuwa
bessidi nabbaboy odiyoba malana mala oychchite. Nabbabi simmidi
wurssettan de'iya oyshata zaarana mala oottite.

Nabbabuwappe kasetiya Mali be'o Oyshaa

Ha huuphe yohuwanne misiliya xeelliyo wode
kaalliya nabbaboy aattiyo kiitay
ayba gaada qoppay?



Kaduwa

Kadoy Wolaytta biittan gidin hara heeran goshshanchcha gidiya ooppenne shaakettenna goshsha miishshatuppe issuwa. Kadoy dumma dumma miishshata bari giddon oyqqidi kado giyo sunttaakko gakkees. Hegaa giishin kaduwa kado giissidi xeesissiya dumma dummabati kaduwa medhdhishin go"an pe'oosona giyogaa. He miishshati ubbay bantta sunttan sunttan xeesettikkonne etappe issoy paccikko kadoy oosuwan pe'ennaagee oossinne geeshsha. Hegaa giyogee kaduwa kumetta oottanawu kaduwa bolli uttanawu bessiya ubbatikka paccanawu bessenna giyogaa.

Yaanin kaduwa kumetta oottanawu kaduwa medhdhishin oosuwan pe'iya miishshati aybee aybee gaanawu danddayettees. Ha oyshaa zaariiddi dumma dumma kaduwa danchchiketa akeekanawu danddayettees. Hegeetikka kaduwa mittaa, marashaa, kalchchiya, wogaliya, kasuwa, wodoruwa, siiriyana geliya xishiyanne kalchcheta gattiya xishiya woykko anggalashaa geetettoosona. Hageeti ubbay shiiqidi gayttiyo wode issi sunttan xeesettiya kadoy merettees.

Qommon qonccidabata shiishshidi oyqqiya kaduwa medhdhanawu koyruwan kaduwa mittay doorettees. Kaduwa mittaa koyyiyo wode koyro asaa huuphiyan aqiyay qottaa. Ha mittay dulle heeran qoobbatti ekkidi sinttawukko shiiqiiddi qiibaa sitti gees. Kaduwassi haniya mittay qanxxanaappe kase equwan xeelliyo wode quuna milati ekkees.

Hegaa giishin ha mittay equwan xeelliyo wode dulle heeran mooqe qottaa oyqqees giyogaa. Yaatidaagaa xeelliyo wode issi kihuan aybakko idimmanawu giigi uttidabaa milatees. Ha mittaa demmoogaappe guyyiyan mittay qanxxettidi amarida wodiya shullanaadan oosettees. I shullanaappe kasetidi awu koshshiya heezzu luhoti maarisan woocettidi giigoosona.


Ha luhota shullennan de'ishin woocirggiyo gaasoy mittay meliichchikko woocanawu waayissiyo gishshataassa. Ha luhotuppe issoy dulliyan qoobbattiya sohuwassi zokkuwara soo woocin kaduwassi kasuwa gelissiyo sohuwa. Ha sohuwappe qiibaa guyyekko shiiqidi haddirssappe ushachchi lukettiya luhoykka kaduwassi keehippe koshshiyaba. Ha luhoy anggalashay ya bagganne ha bagga kalchchiya gattidi oyqqiyo sohuwa.

Kaduwassii sintta xeeranka haddirssappe
ushachchi lukettiya luhoy de'ees. He luhoy
booraa morggiyan wodhdhida qambbaraappe yiya
miraaray kaduwa xeeraappe mulluxettidi kiyi
wodhdhennaadan naagiya anggalashay geliyo soho.
Hageeta ubbaa istta naa" a giidi qoodikko kaduwa
bollan de'iya luhoy heezza gididi erettees. Ha
heezzu luhoti xayikko suure kaduwa medhdhanawu
danddayettenna.

Luhotikka hiillan erettida asan lukkettanawu
koshshiyogee oossinne qoncce. Ha luhuwara
geliyabati ubbatikka zuuqetta koshshennan
geliyaba gidana koshshees. Hegaa giyogee kalali
giidikka gelennan qibbaa un" i ekin issiban shocidi
gelissanaadan naagettees. Kalali giidi gelikko
oosuwa oottiyo wodiyan guyye solddiichchiyo
gishshawu luhoy koshshiyogaa keenaappe
aakkanawu koshshenna.

Hiillaa koshshees giishin ubbakka ooninne malanawu danddayennaba giyogaa gidennaagaa erana bessees. Gaasoykka maarisaynne meezee de'iyoo uri ooninne kaduwa mittaa bolli lukkiyo luhota lukkanawu danddayees. Issi uri barissi go'ettiyo kaduwa bari kushiyan oottada go'ettana giikko diggiyabi baawa gaanaassa. Gidoppe attin kushe hiillay de'iyoo asan lukettiyakko aaro injjiya demmanawu danddayettees.

Hegeetuppe qassi kasoy geliyo luhoy cun"iyara sharqqe giddo lukettiiddi qiibaa uluwakko zuubbari ekkees. Hegeekka kaduwa waaxiyo wode qiibaa gisi ekkanaadaaninne goshshawu injjetana mala oottanaassi maaddees. Hegaadan gisi ekkana xayikko eqa gididi goyyiyo wode keehi daafurssees.



Kaduwa kifileta

Issi suure giigidi merettida kaduwassi dumma dumma kifileti de'oosona. Hegaa kaduwa aadhdhiiddi ayfiyan xeellida uray ooninne akeekanawu danddayees. Ha kifileti ubbay shiiqidi waaxettiyo wode kaduwassi minota woykko wolqqa gididi kadoy koyyido hanotan goyissiya goshsha miishsha gidees. Qanttaara hageetu woykko kifiletu issippetettay kaduwassi wolqqaa immees giyogaa.

Ha kifiletuppe issoy marashaa gaanawu danddayettees. Marashay issi mino birataappe qoxettidi xeeray biittaa phalqqi phalqqi baanaadan qofettidi tooraa xeeraa milatissidi qoxxin merettidi

oosuwan pee'ees. Hanenna birataa qoxxidi marasha kessana giikko elle leeqqamiichchiyo gishshawu danddayettenna.

Kaduwa kifiliyappe haray marashaa kookkiyan gelidi kaduwa sharqqiyara zokkuwawu kanttidi kushiyan oyqqiyo sohuwa gakkanawu de'iya kifiliya. Ha kifilee go'ettiya asay ubbay eriyogaadan kasuwa geetettidi erettees. Kasoy asay goyyiiddi hokkidi xeessaa sakettennaadan xoqqu giidi giigana bessees. Kasoy oyqqiya asaa kushiya meennaadan suure malallidi masettidaagaa gidanawu bessees.

Kasuwa issooti issooti masetta xalla gidennan qara qara mashshaa ekkidi sofoosona. Hegeekka goyyiyo wode kushiya meennaadaaninne oosuwan elle xalalissennaadan oottanaassa. Hegaadan oottana xayikko booratu bolli ehiyo metoy de'ana xayikkonne goyyiya asaa kushiya tolshshissidi xiiriyogan goyyanawu halchchido sohooy wurennan

essanaadan un"ettees. Hegaa xalla gidennan sahuwassikka aatti immanawu danddayees.

Hegaadan hanidi oottiyo oosoy qanxxettennaadan oottanawu kasuwa giigissiya asay goyyiya marashaa qaratettaa naagiyogaadan kasuwa puulatettaa naagees. Kasoy soofettidi giigiyogaa xalla gidennan kaduwassi dulliya matan labbani ekkidi kushiyan oyqqiyo heeran sinttawu qoobbattidi sitti giidaagaa gidanawu bessees. Hegée goyyiya asay sitti giidi kasuwa oyqqidi goyyanaadan maaddanaassa.


Yaatidi giigissido kasuwa oyqqidi goyyiyo wode ayba xalalinne siyettennan koyyidoogaa keenaa goyyanawu danddayettees. Hegaa giyogee pe'anaashin goyyiyakkonne namisi siyittikkonne woykko boori daafurikkoppe attin goyyiya asawu aybanne milatennan agganawu danddayees. Hinkkuwan gidikko hokissidi goyyanawu injjetennan ixxidi qiiba sohuwa goyyishin daafurssi aggees.

Kaduwassi kaduwa mittaa, kalchchiyanne marashaa gattidi xorgganni oyqqiyagee wogaliya geetettidi erettees. Wogaleekka marashaagaadan mino birataappe qoxettidi oosuwan pee'ees. Ha wontta qommon xeesettidabata ubbaa xorgganni oyqqiyo beeray wogaliyassi imettiyo gishshawu I oosettiyo biratay keehippe mino gidanawu bessees. Hegaa gidana xayikko wodoroy xaphphidi dafiyo wode xooqetti wodhdhiyogan koyettiya haggaaaza immennan agganawu danddayees.

Wogalee mino birataappe oosottanawu bessees giyogee suure haggaaaza immidi asay galla galla marccuwa kessidi shammenaadan oottanaassa. Hegaa xalla gidennan oosuwa wodiyakka duma duma gaasuwan qoraphphanaassa. Wogaliyassi qottaa xeelliyo wode eessaa birilliya milatees. Marashaa do'uwa gelissiyo sohooy irzzo qottaa oyqqees.

Marashayenne kalchchee geliyo sohay irzzo gididi miyyawu, pudenne duge mulluxettidi kiyiyo sohay baynnabaa. Qommo baggaara wodoruwa zaaretti zaaretti yuushshidi waaxanaadan biradhdhiya dugekko kulum"idi kookkiyara yuuyyiya wodoroy koyyidoogaadan yuuyyidi oyqqanaadan oottanawu maaddees. Wontta qommon mino birataappe qoxettana xayikko xooqettees geetettidoy hegaassa.

Hegaa erida asay wogaliya qoxissanawu keehippe halchchidi demmido birataa go'ettees. He birataykka ha"i wodiyan baalasttira giyo birata qommuwappe doorettees. He birataappe oosettikko asaassi mino haggaaaza immiyogaappe aadhdhidi adussa wodiyawu yaa haa geennan woykko xooqettawu hirggennan gam"anawu danddayees. Yaatiyo gishshawu darotoo mino biratay doorettees.



Kaduwassii hara bollaa kifilee qassi kalchchiya geetettidi erettees. Kalchchee haratuugaadan payduwan issuwa xalla gidenna. Kaduwa mittaa dulliyassi haddirssaaranne ushachchaara uttidi anggalashan oyqettiya naa"u kalchcheta de'oosona. He kalchchee daro wode shulla odooruwa mitaappe merettees. I oosettiyo wode sitta giidi gidenna. Hegaa giishin ikka issi bagga zooziyara qibbaa labbaani ekkidi anggalashay oyqqiyo sohuwara sookko qoobbattees.

Kalchchiyassikka kaduwara gattiya mittay geliyo sohoynne kalchcheta issuwa haraara gattidi qachchiya baqettay geliyo luhettay de'ees. Hegaa

giishin kalchchee hegaadan lee'e gidiiddi waanidi
lukettanawu danddayii giya oyshay denddanawu
danddayees.

He oyshaassi zaaroy qassi naa"u kalchcheta
baqettan oyttiya luhoti masetti simminkka
luhettana danddayoosona. Hinkkoy woykko
kalchcheta kaduwa mittaara gattiya luhoy
kalchchee masettennan de'ishin lukettees.
Koyroogee awudenne lukettanawu danddayees
giido gaasoy I woocettiyo sohay dulle baggan
guyyekko shiiqidi dembbaana gidiyogaa.

Naa''anttoogee qassi massiichchikko lukettana
danddayenna cora gaasoy de'ees. Hegappe
amaridaagee muume gidiya mittaa massidi
looceyiichchikko woykko gonggeyiichchikko
maarisay geliyo wode shooletti wodhdhiyogaa.
Yaatiyo gishshawu massennan de'iiddi muumiyan
de'ishin lukkidi masettaa doommanawu bessees.

Issi baggaara muume mittay lukkanawukka
keehippe deexxees giidi qoppanawu koshshenna.

Hegaadan oottidi maaray mankkay de'iyoo ogiyan
giigissido kalchchee go'ettiyagaa A de'o layttan
adussa wodiya haggaaanawu danddayees. Issi
issi heeran kalchchee bayzettiyo gishshawu
lo"onne muruta gidiyagaa giyaappe dooridi
shammanawu danddayettes. Gidoppe attin asi
bariyyo giigiyogaadan bari kushiyan medhdhidikka
go'ettanawu danddayees. Kalchchee asaa naati
wottiyo caammaadan haddirssayenne ushachchay
de'iyoba gaanawu danddayettes.

Haddirssatettayenne ushachchatettay aybissi
koshshii giikko ikka asaa gediyaan ushachchaagee
haddirssi haddirssaagee ushachchi aadhdhi
wodhdhikko oottenna. Hegaa giyogee naa"ay
liphphi giidi maayettikko suurenne lo"o kaduwa
murutaa demmissiyo hanotay merettes.

Kaduwa meruwan hara koshshiya qeeribatikka de'oosona. Hegeetikka baqettaanne anggalasha geetettidi erettiyageeta. Anggalashaa giyogee kaduwassi sintta xeeran miiraaraa mulluxettennaadan naagiya qiiba xishe gaanawu danddayettees. Ha xishee issitoo issitoo booraa kaduwan de'iya miishshatu ubbaarakka go'an lagge. Gaasoykka he xishiya xayikko tamma solddiiddi goyissenna.

Haray qassi anggalashaa geetettidi erettiyagaa gididi ikka luhuwa giddo gelidi naa"u kalchcheta gattidi xorgganniyagaa gaanawu danddayettees. Hagee daro wode miqiya mittaappe qanxxettidi meli simmin go'ettiyoogaa. Wurssettay qassi wodoruwanne baqettaa geetettidi erettees. Wodoruwassi go"ay kaduwa gidдон de'iya ubba miishshata issuwa issuwara gattidi oyqqiyogaa.

Kaduwa Go"aa

Goshshanchchaa gallassa gallassa de'uaninne
oosuwan kadoy hashetenna oosoy baawaa
gaanawu danddayettees. Kochchooro
boshettibeenna otta biittaa aylliyan porqqayiiddi
daro wodiya ekkiyogaappe issi kutti daakki
olanawu kaduwa gakkiiyay baawa. Hagaani qassi
kadoy otta biitta xallaa goyyiiyye giya oyshay
denddanawu danddayees. Ha oyshawu zaaro
gidiyagee otta xalaalaassa gidenna giyagaa.

Kadoy kase aylliyan woykko hara goshsha
miishshan oosettidi ka''ibeenna gadiya goyyidi
liiqissanawukka maaddees. Hegaa xalla
gidennan kadoy ka"ida gadiyan zeriobawunne
tokkiyobawukka immiyo go"ay guutta gidenna.
Hegaa giyogee asay yafaraa kessanawu aylliya
xikkiya go'ettidi daro wodiya xuuggennan
kawushshan kessidi eesuwan wurssiyoy kaduwana.

Kadoy zerido kattaa bul"iyankka hegaa keena gaanawu danddayettenna beeraa kaa'ees. Issi boora sohuwan de'iya badalaa bul"anawu daguwa keeridi xikkiya garxxiiddi barchchiya be'ennaadan issi kutti amarida wodiyan shali yeggees. Hegaa poliyoy sooni suure hanotan giigidi uttida kaduwa go'ettidi gidiyogee qoncce. Suure kadoy de'iyabaa gidikko shalanawu koyyido badalay ay keenanne gido un"ettennan eesuwan wurssanawu maaddees. Xaaxi waaxiyo wode Wolaytta biittan gooshshaa oosuwa poluwan kadoy asay eesuwan ekkidi kiyiyo wolqqaama goshsha miishshatuppe issuwa.

Nabbabi simmidi zaariyo oyshata

Nabbabuwannin ne buzo akeekan amppada kaalliya oyshata zaara.

1. Kaduwa giyogee aybee?
2. Kaduwa kifileti aybee aybee?
3. Kaduwa mittaa hara mittaappe duma ottiyabi aybee?
4. Kadoy bayinnaakko asay aybin go"ettana danddayii?
5. Nabbabuwa gidon “shalanawu” giya qaalawu gelo birshshettay aybee?

